

# EUSKARA AMARI

A. LARRAMENDI-REN JAYOTZAKO BIGARREN EUNKIDAN.



Iruditzen zait, ama nerea,  
 Zerala aurpegiz alaitzen,  
 ¿Nundik norako alaitasuna  
 Diguzu bada agertzen?  
 Aspaldichuan irri-farre-bat  
 Zugan ez bada ikusten,  
 ¿Zérek dizu oraiñ zotiñ larriya  
 Atsegiñ gozo biurtzen?

—Bizi ro maite izandu nauten  
 Seme askoren artean,  
 Larramendi-ko Manuel nerea  
 Etzan gelditu atzean;  
 Zeñak ninduen beti gordeta  
 Iduki biyotz berean,  
 Kontu egiñaz jauzi ez nediñ  
 Etsai gogorren mendean.

Biyotz aundiko seme portitz au  
 Liburuakiñ burrukan,  
 Ikusi oizan egun eta gau  
 Sosegu gabetanikan;  
 Sentitu gabe neke penetan  
 Iñoiz atzerapenikan,  
 Sari oncho bat amarentzako  
 Eskuratzea gatikan.

Ala ipiñi ziran eskuan  
 Nere izkuntzan argiya,  
 Atsegiñ gozoz betetzen nauen  
 Liburu eder aundiya;  
 Alainzo eta lanaren buruz  
 Moldatutako sariya,  
 Izandu nezan beti betiko  
 Bere oroimengarriya.

Eta onela oroituzian  
 Seme on onen jayotza,  
 Arritzeko dan pozkidaz eziñ  
 Geldi egon zait biyotza  
 Mugitu gabe esnatutzero  
 Euskal-erritar bakoitza,  
 Festaturikan egiñ dezagun  
 Egun beraren oroitza.—

Arrazoizkua, bai, nere ama,  
 Zugan sortu dan antsiya,  
 Festa on batez nai izatea  
 Onratu seme aundiya;  
 Eziñ geyagoz izan dizuna  
 Aiñ amoriyo garbiya,  
 Zeña zegoan prest egiteko  
 Zuri altzuen guziya.

Guk ere pozik artuko degu  
 Festa onetan partea,  
 Onela dediñ chit onratua  
 Izan anaya gurea;  
 Eta ispillu garbi orretan  
 Ikasirikan bidea,  
 Segi dezagan bere antzera  
 Maitatzen ama maitea.

J. FRANKO ARANGUREN-GOAK.

Zumayan, 1890-garren Abenduaren 23-an.

